

Ehuhuo-Ozi Ibufo Polu Dejenni

Ndi Kọrẹnti

Ndi Kọrẹnti, Nke Ibufo

¹ Mmẹ wu Polu de Ekwowo-ozini, mmẹ lẹ nwene ẹnị wu Sostenesi. Kraisti wu Jizosi kpo m, tumẹ m onye-ozị e pu-ichen makeni uche Osolobue ro. ² Ẹnyi ri e dejenni ndi uka Osolobue hun ri obodo Kọrẹnti; ndi Osolobue don nsọ ime Jesu Kristi; ndi we kpo d'a wuru ndi-nsọ. Ẹnyi ri e dejenni uwe lẹ ndi ile ri ebe owule, hun a kpoku efan Nna-enyi wu Jesu Kristi—Nna ẹnị lẹ we. ³ Efofa lẹ udon hun gha eka Osolobue Nedi ẹnị lẹ Nna ẹnị wu Jizos' Kraisti bia ya noyeni unu.

Ngọzi Hun Ri Ime Kraisti

⁴ Ogen ile ke m gi e gi ifiri unu a kpanmin Osolobue, make ihien ile o gi gozi onu ime Kraisti wu Jizosi. ⁵ Makeni, ime Kraisti, unu e nweguoyiye bu oda uzọ ile—ke oyiye iku-oku ke udi amamihien ile ri ichen-ichen— ⁶ ke o donzi ri a puha ifon ni ozi Kraisti e weriguoyiye ime unu. ⁷ Ya wu, oyiye Mmon-nsọ akoni unu, ke unu don ri e che obibia Nna-enyi wu Jizos' Kraisti.

⁸ Nna ẹnị wu Jizos' Kraisti k'e mezikwo unu turu d'e ru njendeme, make unu gha e nwon nkoriani Uhuohin Nna-enyi wu Jesu Kristi. ⁹ Osolobue hun kpo unu d'e son Nwa a wu Jizos' Kraisti Nna-enyi meko wu onye we e gi don enya.

Ikpe Lẹ Nkebe Ime Uka!

¹⁰ Umune, m gi efan Nna-enyi wu Jesu Kristi a rifo unu, ni unu ile e kweyeni ibe unu, amangbe nkebe gha a ri ime igunrun unu, kama, ni unu e nwe obi ohu, a chu ihien ohu.

1 Ndi Kọrẹnti Isi Nke Ohu:1121 Ndi Kọrẹnti Isi Nke Ohu:21

¹¹ Umunę m, m rị e ku ọnwani makeni ndi hu ime ndi ikpun-ulo Klo a gwaole m ni ikpe le nkebe ri ime igunrun unu.

¹² Ikpe le nkebe m rị e ku wu ni ndi hu ime unu ri a si, “Polu ke m'e son;” ndi hu si “Apolosi ke m'e son;” ndi hu si, “Kefasi wu Pita ke m'e son;” ndi hu si, “Kraisti ke m'e son.”

¹³ Kraisti kebe ekebe? Polu ya nwunni unu onwun? Ra efan Polu ke we gi me unu mirin-Chuku?

¹⁴ A kpanminkwo m Osolobue n'o nwonni onye m me mirin-Chuku ime unu mmani Krisposi le Gayosi— ¹⁵ ya wu, o nwonni onye owule k'a si ni we gi efan m me unu mirin-Chuku. ¹⁶ (Eghee, e meghozikwo m ndi ikpun-ulo Stefanasi mirin-Chuku. Wezuka ndini, anyanhanzini m ke o nwongho onye ozo m me mirin-Chuku) ¹⁷ Makeni, ele mirin-Chuku ke Kraisti zi m d'e me; kama, o zi m d'e zi ozioma; ele nke onye ma donye oku, amamgbe o no ke si elezi iken gha onwun Kraisti welua enwen e ali nwun elu obe ke we gi a run a.

Kraisti Wu Iken Le Amamihię Osolobue

¹⁸ Makeni, ozi banyeni onwun Kraisti nwun elu obe wu ihię nzuzu ebe ndi lako ntikpo ri; kanị ebe enyi ndi Osolobue ri a zuopuha ri, iken Osolobue k'o wu. ¹⁹ Makeni Ehuhuo-nsọ si,

“M k'e wiwi amamihię
ndi marin ihię;
m k'e budan ako-le-uche
ndi nwon uche.”

²⁰ Elebe ke onye hu marin ihię ri? Elebe ke oka-ehuhuo ri? Elebe ke onye hun kacharin ali-okụ amarin ri? Osolobue e meguni ni amamihię uwanị wuru ihię nzuzu?! ²¹ Makeni, ebe o me ni uwa asani eka gi amamihię we marin Osolobue ebe o no gi amamihię e

1 Ndi Kọrẹnti Isi Nke Ohu:2231 Ndi Kọrẹnti Isi Nke Ohu:31

e mę ihien, ọ sọ Osolobue n'o gi nzuzu ri ozi enyi ri e zi zuopuha ndi hun kwerini.

²² Ndi Ju si we k'a hunri ri orun-atumenya pu-ichen we kebe kweri; ndi elu Grika si mmani ya le amamihi en we dangbama, ekweriko we. ²³ Kani enyi hu e zisonme ozi Kraisti hun we gi obe kpogbu: ebe ndi Ju ri, ihien atunya we e lenia a kpogburu ro; ebe ndi wuleni ndi Ju ri nzuzu ro. ²⁴ Kani, nke ndi Osolobue kpọ, ke ndi Ju ke ndi wuleni ndi Ju, Kraisti wu iken Osolobue le amamihi en Osolobue. ²⁵ Makeni, “nzuzu” nwen gha aka Osolobue bia ka amamihi en ihian; “ndun-ogugu” nwen gha aka Osolobue bia ka iken ihian.

²⁶ Umune m, lekpo ni ihien unu wusonme ogen Osolobue gi kpọ unu: ndi bu oda ime unu ele ndi uwa a kpọ ndi marin ihien; ndi bu oda ele ndi-uku; ndi bu oda ele umu-nze. ²⁷ Kama, Osolobue hori ihien ndi ahun wu nzuzu enya uwa, keni o gi we gbe ifenren ye ndi marin ihien ihun; ọ hori ihien ndi hun zeleni, keni o gi we gbe ifenren ye ndi zeni ihun. ²⁸ Osolobue hori ihien ndi hu lua ali, hun w'e lenia elu uwani, le ihien ndi hu nwonleni ihien we wu ime uwani, keni o gi we wetu ihien ndi hu ri mkpa ali. ²⁹ Osolobue me erira make onye owule gha a nyann'a isi. ³⁰ Osolobue me unu gi nwan ri ime Kraisti wu Jizosi e bi. O meguo Kraisti wuru amamihi en enyi— amamihi en hun gha aka Osolobue bia, makeni Kraisti k'o gi me enyi wuru ndi ri ochan, don enyi nsọ, gbafuha enyi. ³¹ Erira ke Osolobue gi me n'ọ ri ke Ehuhuo-nsọ don ku, si, “Onye owule k'a nyan isi, ya gi ihien Di-nwonni-enyi me sọ nyan isi.”

Isi Nke Ebuo

Iken Osolobue, Ele Amamihi en Ihian

1 Ndi Koręnti Isi Nke Ebuo:141 Ndi Koręnti Isi Nke Ebuo:12

¹ Umunę m, ogeń m gi bia d'e zi unu ozi Osolobue, ekuni m oku ke onye ma ku, ekuni m nke ndi marin ehuhuo mobu ndi wakenme enya. ² Makeni m kwademe obi m ni ekuko m ihien ozo, emeko m oku ihien ozo owule ime igunrun unu wezuka Jesu Kristi leni we kpogbu ya wu Jesu Kristi elu obe. ³ M bi ke onye nweleni ihien o wu ogeń ahun, a kpachanpu enya ohunma-ohunma, e gi ehuhuma-nni e bi. ⁴ Ebe m no e ku oku le ebe m no gwa unu oku-Chuku, ekuni m ke ndi marin ihien, ekuni m hun k'a suo ihian usuo ntin, o kweyeni m. Kama, m hu e ku, a ghosi unu ni aka Mmon-nso le iken e ri a. ⁵ M me erira keni unu gi ifiri iken le aka Osolobue rin'a kweri, sonme Jesu, ele ifiri amamihien ihian.

Amamihien Osolobue

⁶ Kanj, enyi e ku oku rike ndi marin ihien ebe ndi ka-ehu ime okukwe ri, kanj ele amamihien eluni—mobu nke ndi ri a ki ogenni hun lako iwi. ⁷ Mba, enyi ri e ku oku amamihien Osolobue, ya wu, ihien ahun mini hun Osolobue kwademe n'o d'e kede uwa n'o k'e gi e ye enyi ogho. ⁸ Ime ndi ri a ki uwani, o nwonni hun ghota ihienni; makeni, omeni we te ghota a, we e ke kpogbu Nna nwe ogho ile. ⁹ Kanj, noke ke Ehuhuo-nso don ku,

“Enya ahuntuni,
ntin anutuni,
ihian erotuni

ihien Osolobue kwademe ni
ndi o nwe ihien-osusuo we.”

¹⁰ Chuku a ghosiguwo enyi ihien ndini ghahani Mmon-nso a. Makeni, Mmon-nso a maringwo ihien ile, ke ihien nzuzue ri Osolobue obi.

¹¹ Onye marin ihien ile ihian ri e ro wezuka mmon ri ime e? Erira k'o gizi wuru n'o nwonni onye marin obi Osolobue mmani Mmon Osolobue. ¹² Bu ele mmon

1 Ndi Kọrẹnti Isi Nke Ebuo:13 5 1 Ndi Kọrẹnti Isi Nke Eto:5

nke uwanị ke ẹnị nwehẹn, kanị ya wu Mmon hun gha ebe Osolobue ri bia, kenị ẹnị hun uzọ marin ihien ile hun Osolobue shiapu efo ye ẹnị ofe. ¹³ Ihien ndini we Osolobue ye ẹnị ke ẹnị e ku nwan; ẹnị ara gi oku we gi amamihien ihian kuzi ẹnị ku we, kama, ẹnị e gi oku Mmon-nsọ kuzi ẹnị e ku we; e gi oku gha eka Mmon-nsọ bia a kowa ihien ime-mmōn hun gha eka Mmon-nsọ bia.

¹⁴ Onye hun nwonleni Mmon-nsọ ara nabanhan ihien gha eka Mmon Osolobue bia, makeni we wu ihien nzuzu ebe o ri. O saeka ghota we, makeni Mmon-nsọ sọ e me ihian a ghoha we. ¹⁵ Onye nwon Mmon-nsọ a ghotachanrin ke ihien ile nọ, kanị o nwonni onye hun a saeka a ghota ya le enwen e. ¹⁶ Ya ke Ehuhuo-nsọ gi si, “Onye marin obi Di-nwonni-ẹnị?”

Onye k'e ri-eka dun a odun?”

Kanị, ẹnị e nwongho obi Kraisti hun ẹnị gi a marin obi Di-nwonni-ẹnị.

Isi Nke Eto

Ndi-uka Ri A Zuọ Eka-nke!

¹ Umune, asani m eka gwa unu oku ke ndi nwe Mmon-nsọ; kama, m gwa unu oku ke ihian mmaka, leke ndi wu unu-ndu ime Kraisti. ² Eran ke m ye unu, ele ihien-oriri zeni; makeni unu e runi ogo e ri ihien-oriri zeni. Unu e ke rukwo nwan ogo e ri n'e, ³ makeni echen ke unu rikwo e bi ke ndi nwonleni Mmon-nsọ, ke ihian-mmaka. Eghese, ebe o me ni enya-ufu le ikpe ri ime igunrun unu, unu anoni ke ndi nwonleni Mmon-nsọ? Ele agungun ihian-mmaka ke unu ri a gun? ⁴ Omeni ihian a si, “Polu ke m'e son;” ibe e si, “Apolosi ke m'e son;” ele unu no nwan ke ihian-mmaka? ⁵ Ki Apolosi wude? Ki Polu wude? Ndi-idibo unu gha eka

wẹ kweri kẹ wẹ wuhụ—onye-onye ime wẹ runhụ ogbo Dinwōnni-ẹnyi ye ẹ rụn: ⁶ mmẹ kụn; Apolosi gba a mirin; kani, Osolobue wu onye me ẹ sue. ⁷ Ya wu ni, kẹ onye hun kunnị kẹ onye hun gba mirin e nwon ihien o wu—Osolobue suo, hun e me ẹ e sue, iya ri mkpa. ⁸ Onye hun kunnị le onye hun gba mirin bu ihien ohu obi a rụn. Onye-onye k'a narin ugwo a k'o don rụn. ⁹ Makeni, ndi-orun Osolobue kẹ ẹnyi wu; ẹnyi ri a rungbama. Unu wu ugbo Osolobue, unọ Osolobue ri a tun. ¹⁰ Ghahani ẹka Osolobue hun ri ime ndun m, e gbegwo m iyetọ noke okaa-ulọ; onye ozo ri nwan a tunye elu ẹ. Onye-onye kpachanpukwo ẹnya k'o don a tunye elu iyetọ ahun.

¹¹ Makeni onwōnni onye owule k'a sa ẹka gbe iyetọ ozo kari hun rinị, hun wu Jesu Kristi.

¹² Kẹ goru kẹ ihian gi ri a tunye enu iyetọ hu-o, kẹ ola-o, kẹ omuma ndi hun a koni-o, kẹ osisi-o, kẹ irurue-okponkun-o, kẹ achara-okponkun-o—¹³ kẹ orun ihian no jenkọ d'a puha ifon, makeni Uhuohin hu lalanị jenkọ d'e wepuha a ifon: wẹ k'e gi okun ghosi k'o ri; okun hu k'e lele kẹ orun onye-onye rụn ri. ¹⁴ Omeni ihien ihian rụn turuhukwo, o k'a narin ugwo-orun a. ¹⁵ Kani, o dunpu okun, ihien siko d'e hunahin onye ahun, kani ya le enwen ẹ k'e nwon nzuopuha, bu o k'a no kẹ onye wẹ gha ime okun lofuha.

¹⁶ Unu amarin ni unu wu Ulo-nso Osolobue?! Unu a marin ni Mmon Osolobue bi ime unu?! ¹⁷ Onye owule meru Ulo-nso Osolobue, Osolobue k'e tikpo a, makeni Ulo-nso Osolobue ri nso—bu 'ya wu Ulo-nso kẹ unu wu. ¹⁸ Edufiekwole ni enwen unu! Omeni unu ri e ro ni onu marin ihien ime uwanị, wurukwo ni ndi-nzuzu, keni onu wuru ndi marin ihien nke-esi. ¹⁹ Makeni, amamihien uwanị wu nzuzu ẹnya Osolobue. Ya me Ehuho-nso gi si, “O nwundon ndi marin ihien

1 Ndi Koręnti Isi Nke Ẹto:20 7 1 Ndi Koręnti Isi Nke Ẹno:7

ime ẹro we.”

²⁰ Ẹhuhuo-nsọ sizi,
“Di-nwọnni-ẹnyi a maringuo
ni iroro ndi marin ihien
wu ihien olal'iwı.”

²¹ Ya wu, egizile ni nwan ihian a nyan isi, make ni ihien ile wu nke unu: ²² ke Polu-o, ke Apolosi-o, ke Kefasi wu Pita-o, ke uwa ile-o; ke ndun-o, ke onwun-o; ke ihien ri oge ni-o, ke ihien ri ihun-o, we ile wu nke unu; ²³ unu wu nke Kraisti; Kraisti wu nke Osolobue.

Isi Nke Ẹno

Ndi-orun Kristi

¹ Ya wu, o furu ni ihian e weri ẹnyi ke ndi-idibo le ndi-orun Kraisti le ndi we busonme ihien-mini banyeni Osolobue che ẹka. ² Ihien w'a cho ẹka onye we bu ihien che ẹka wu k'o furugho onye we gi e don ẹnya. ³ O me nke m, o nwekeni ihien o wu ebe m ri ni unu mobu o gwa ihian-mmaka owule ri e kin m ikpe; m'a ra kinde enwen m ikpe enina. ⁴ Ezie, obi m ri ochan—o nwonni eje-ihien m marin m me. Kani, ohun aghosini ni o nwonni eje-ihien m me; Di-nwonni-ẹnyi ya e kin m ikpe. ⁵ Ya wu, eke hanle ni enen ebe ogen keleni ru. Cheriguu ni ni Di-nwonni-ẹnyi bia. O jenkọ d'e wepuha ihien zueri ime ishi ifon. O k'e kpuchanrin ihien ri obi onye owule oghe. Ogen hu, onye owule a narin ojija-mma run'e ẹka Osolobue.

⁶ Umune m, e giguu m mme le Apolosi kowa ihien ndini ile make orinimma unu, keni unu munarin ẹnyi ali oku ahun hun si, “Emeghafele ihien we de ime Ẹkukwo-nsọ,” make unu gha e gi onye ohu a nyan isi, e lenia ibe e.

⁷ Onye gwa i ni ihien ri ichen ri egbata 'yu le ibe i? Kini k'i nwon hun Osolobue yeleni i? Omeni o ye y'e e ye, ki i ri e gin'e a nyan isi nọke si ele ihien we ye i e ye ro?

1 Ndi Kọrẹnti Isi Nke Ẹnọ:881 Ndi Kọrẹnti Isi Nke Ẹnọ:21

⁸ Ụnụ e mę kę sị ẹfọ e junguọlę ụnụ! Ụnụ e mę kę sị ụnụ e higuọlę ọdafin! Ụnụ e mę kę sị ụnụ e hęringuọlę ndi-nze, bu ẹka ẹnyi aria! K'ọ rị m, ụnụ e hęringuọlę ndi-nze nke-esi, kęni ẹnyi sọn ụnụ kị! ⁹ Makęni, ọ rị m kę sị Osolobue e weguọ ẹnyi wu ndi-ozu pu-ichęn che azuun, lękę ndi wę ma ikpe ọnwun wę dupukọ d'e gbu idęnya ihian ile. Makęni, ẹnyi a wuruguo ihien uwa ile a gba ile, kę ndi mmon-ozu kę ihian. ¹⁰ Ẹnyi wu ndi nzuzu makę Kraisti, kanj ụnụ a marinka ihien ime Kraisti! Ẹnyi rj anunua, kanj ụnụ ze e ze! Wę hu a gbaye ụnụ, kanj wę hu e lejia ẹnyi! ¹¹ Echęn kę ẹgun ihien-oriri lę ihien-orira a gunkwo nwan ẹnyi; ẹkwa ara zu ẹnyi ukun; w'e meshi ẹnyi ikęn; ulọ aria. ¹² Ẹka ẹnyi kę ẹnyi gi a luru d'e ru ni ẹhu a gborọ ẹnyi. Wę kpari ẹnyi, ẹnyi a gozi wę; wę kpokpo ẹnyi, ẹnyi e din e; ¹³ wę kutọ ẹnyi, ẹnyi e gi onu-oma sọn wę; ẹnya uwa, ẹnyi e hęringuọ ẹfifia mmaka lę unyin w'a chanpu—d'e rukwo tanni.

¹⁴ Ari m e de ihienni kęni ifenren mę ụnụ, kama, m gi e a dun onu ọdun nọkę umu m rj m obi. ¹⁵ Eghęę, ọ sọ n'a ni onu nwon ndi-ndu nnu-uku ole-le-ole ime Kraisti, ụnụ e nwe nedi bu oda, makęni m hęrin nedi ụnụ ime Kraisti wu Jizosi—ghahani ozioma m zi ụnụ. ¹⁶ Ifiri e, m rj nwan a dun ụnụ ọdun: kinrin ni m nwan. ¹⁷ Ya hain m gi zilani ụnụ Timoti, ezi nwa m, hun m gi e don ẹnya ime Onyę-nwonni-ẹnyi. O k'a nyanhan ni ụnụ kę m'e mę ihien ime Kraisti, nyanhan ni ụnụ ya kę m'a kuzi e ime uka ile rj ebe ile.

¹⁸ Ndi hu ime ụnụ a pachemęguọ nwan makęni wę rj e ro ni abjako m. ¹⁹ Kanj m lala ẹgwa, omęni Di-nwonni-ẹnyi a choghọ. M bja, a hun m ikęn ndini rj a pacheni nwon, ẹlę oku-onu wę sọ. ²⁰ Makęni, Ali-eze Osolobue ẹlę oku-onu oku-onu, ikęn kę wę gi a marin a. ²¹ Elee hun ka ụnụ mma? Ni m węhę mkpinyin ra ni m gi ihien-osusuo lę ẹka-

1 Ndi Kọrẹnti Isi Nke Isen:1 9 1 Ndi Kọrẹnti Isi Nke Isen:11
anunua bia?

Isi Nke Isen

Onye Uka Ghereni

¹ E kughode w'a ni ughere ri ime igunrun unu, udi hun ndi a rua mmon ghaleni a gherede—ebe okennyẹ no na nedi e nwunye! ² Bu unu hu a honron! Ele ezigbo ekwan nke unu a kwanma, chupu onye ahun me ihienni ime igunrun onu?!

³ Ya wu, osuon'a ni ari m ebehu unu ri elee-m, elee-i, m hu a ime-mmon; a hangbuguole m okennyẹ me ihienni enen rike si m hu ebehu. ⁴ Unu gihu efan Nna enyi wu Jizosi gbakikome—mme nwen k'a rizi ebehu ime-mmon, iken Nna enyi wu Jizosi k'a rizikwo ebehu— ⁵ unu e we onyeni che aka Ekwensu ni we hun uzọ tikpo ehu a, keni mmon a hun uzọ nwon nzuopuha Uhuohin Nna enyi wu Jesu Kristi. ⁶ Isi unu ri a nyan ari mma! Unu amarin ni we buchehu ekerẹ yisti, o ghagbama ogbe hu ile we gi e memẹ bredi, fuchanrin a? ⁷ Wepu ni nwan yisti akan, keni unu wuru ogbe ohun yisti rileni—hun unu wu nke-esi. Makeni e gbuguọ we Kraisti wu Ebulu-nghafe enyi, gi e chu ejan Mmemme-Nghafe. ⁸ Ya wu, ni enyi gi nwan bredi hu yisti rileni, hun wu ishiapu-efo le ezioku, me ya wu mememe, ele yisti akan hun wu iwe le eje-obibi.

⁹ E deguo ni m unu ehuhuo-ozu mbu, si unu le ndi-ughere emekole. ¹⁰ Elekwọ ndi uwanị kwerileni hun a ghereni mobu ndi enya-uku mobu ndi a tunarin ihian ihien we mobu ndi a rua mmon ke m ri e ku. Omeni uwe ke m te ri e ku, ya wu ni unu k'a gha ime uwanị pu. ¹¹ Kanị, m ri nwan e deni unu, a si unu esonle onye owule kpo enwen e onye-kwerini meko, omeni o ghere aghere mobu ni o nwe enya-uku mobu ni o rua-mmon mobu ni o kpari ihian, a kpo iyi mobu ni o ra manya a tu, mobu ni o tunarin ihian

1 Ndi Kọrẹnti Isi Nke Isen:12101 Ndi Kọrẹnti Isi Nke Isin:10

ihien e. Unu le udi ihian no erira erigbamadele. ¹² Elee hun biri mme le ihanni ndi ri ogbe enen? Ele ndi ri ime uka ke unu k'a hannii enen? ¹³ Osolobue ya nwe kin ndi ri ogbe ikpe: "Chupu ni nwan eje-ihian hu ime igunrun unu.*,"

Isi Nke Isin

Ewejenle Ndi Uka Ibe I Ogwa

¹ Onye owule ri ime unu hun ya le ibe e ri e se oku, o ru egun a ni a we oku ahun jen aka ndi kwerileni, hun nke o gi jemburu ndi kwerini? ² Unu a marin ni ndi-kwerini, ya wu ndi-nsọ, jenkọ d'a hannii uwa enen? Omeni onu k'e kin uwa ikpe, ki wuni onu a saeka donzi oku mehu ekere? ³ Unu amarin ni enyi jenkọ d'e kin ndi mmon-ozii ikpe? O ri wuzi ikpe mmaka ri ime uwani! ⁴ O me nwan ni unu nwon ikpe no erira, ki unu e bun'e e jenni ndi hun oku ri ime uka gbashiarileni? ⁵ M ri e ku ihienni keni ifenren me unu! Ya wu ni o nwonni onye marin ihien ime unu, hun k'a s'eka donzi oku ri egbata ndi-kwerini— ⁶ hun onye kwerini gi e wejen ibe e aka ndi-kwerileni?!

⁷ Ezie, ni ikpe rida ime igunrun unu ghosi ni e merichanringuole we unu. Ibe i me i njo, y'a ra wefu enya? We megbu i, y'a ra gba nkintin? ⁸ Hun nke unu e gi me erira, unu le enwen unu hu e mede ibe unu eje-ihien, e megbude we—ke ndi-uka ibe unu!

⁹ Unu a marin ni ndi e me eje-ihien abanyeko Ali-eze Osolobue? Anikwole ni we dufie unu! Ndi-ughere le ndi a rua-mmon (ndi e fe ihien ozo) le ndi hun a zo-uku-eye-ofia le ndi a na nwunye ihian le ikennyehun ikennyehun ibe we a gba le ikennyehun a gba ikennyehun ndi ahun, le ¹⁰ ndi-ohin le ndi enya-uku le ndi-manya le ndi a kpari ihian,

* **Isi Nke Isen:13** Ditononmi 17.7

1 Ndi Kọrẹnti Isi Nke Isin:11 11 1 Ndi Kọrẹnti Isi Nke Ẹsa:1

a kpọ iyi lẹ ndi a tınarin ihian ihien ẹ abanyeko Alì-eze Osolobue. ¹¹ Ihien ndini ke ndi hu ime unu te wu, kani Osolobue no chanchan unu; o no don unu nsọ; o no gi ifiri efan Jizos' Kraisti wu Nna enyi kuni unu ohunma ghahani Mmon Osolobue enyi.

Gba Ni Ni Ughere Oso

¹² “M nwon iken me ihien owule m cho ni m me”—kani, ele ihien ile e ye aka. “M nwon iken me ihien owule m cho ni m me”—kani emeko m igbon ihien owule. ¹³ “Ihien-oriri wu nke efọ; efọ wu nke ihien-oriri.” Kani, Osolobue k'e tikpo we ebuo.

Ehu ele nke ughere, kani, nke Di-nwonna-enyi ro; Di-nwonna-enyi wuzikwo nke ehụ. ¹⁴ Osolobue gi iken ẹ gha onwun weli Onye-nwonna-enyi; o k'e welizikwo enyi nwen. ¹⁵ Unu amarin ni ehụ unu wuchanrin mkpamkpa ehụ Kraisti? Ni m gi nwan mkpamkpa ehụ Kraisti henrin mkpamkpa ehụ igbaraja? O meko! ¹⁶ Unu amarin ni onye ya le igbaraja gba ranhin le igbaraja e henringwo ehụ ohu? Makeni, ime Ehuhuo-nsọ, we si, “We ebuo e henrin ehụ ohu.” ¹⁷ Kani, onye hun we enwen ẹ cheni Di-nwonna-enyi le Di-nwonna-enyi e henringwo ohu ime-mmon. ¹⁸ Gbakwo ni ni ughere oso! Njo ndi ozo ile ihian e me ele ime ehụ, kani, onye hun ghereni me ehụ a njo. ¹⁹ Ra unu amarinde ni ehụ unu wu Ulo-nsọ Mmon-nsọ hun ri ime unu, Mmon-nsọ hun unu gha aka Osolobue nwonna-enyi, ni ele unu nwon enwen unu? ²⁰ We non unu e non. E gi ni nwan ehụ unu e ye Osolobue ogho.

Isi Nke Ẹsa

¹ Ni enyi leban nwan ihien ndi hu unu de enya.

Olulu Di-letunye

1 Ndi Koręnti Isi Nke Ẹsa:2 12 1 Ndi Koręnti Isi Nke Ẹsa:14

“Ọ hugho mma omeni okennyẹ ebuni uku tukwasi okpoho.”² Kani, make ni ughere jun uzo ile, okennyẹ owule ya luru nwunye; okpoho owule ya luru di.³ Di k'a gha e me ni nwunye e ihien run'e ime olulu di-le-nwunye; nwunye ya e mezikwo ni di e erira.⁴ Make ni, ele nwunye k'e ku ihien o k'e gi ehụ a me, di e nwe ku; erirazikwo, ele di k'e ku ihien o k'e gi ehụ a me, nwunye e nwe ku.⁵ Egile ni ehụ unu a jo ibe unu efo, mmani unu kwerigbama ni unu ye efe ekerẹ oge, kenі onu hun uzo bu enwen onu che ime ekpere. Omegu, onu a nogbamazi, amamgbe Ekwensu a nwan onu, make ni unu a saeka kwondosonme enwen unu.⁶ Kani m rihu e ku e n'o ni me, ele iwu ke m ri e ye;⁷ k'o ri m, ihian ile ri ke mme. Kani, onye-onye nwon oyiye nke e, hun gha eka Osolobue bia—hunni nwe nke e, hunni nwe nke e.

⁸ Nke ndi keleni lu le ndi hun di we mobu nwunye we nwun, m si we n'o hugho mma ni we nodi nke we—noke mme.⁹ Kani, omeni asako we eka kwondon enwen we, we luru—make ni o ka mma ni ihian luru di mobu nwunye kari ni egun ime-mgba hu e gbu e.

¹⁰ Nke ndi luguni, iwu m ri e ye we wu onwan (kani ele mme ri e ye we ya, Di-nwonna-enyi ro): nwunye ajukwole di e mobu kpechan a.¹¹ (Kani o ju di e to mobu kpechan a, y'a lule onye ozo. Hun nke o gi luru onye ozo, ya le di e suokin.)

Di e kpechankwole nwunye e mobu ju a.

¹² Nke ndi ozo, lee ihien m si we me (mme ri e ku onwan, ele Di-nwonna-enyi): omeni okennyẹ wu onye itu-Kraisti nwon nwunye hun kwerileni ni Kraisti, bu nwunye e e kwerigho n'o son e e bi, y'e kpechanl'a mobu ju a.¹³ Omeni okpoho wu onye itu-Kraisti nwon di hun kwerileni ni Kraisti, bu di e e kwerigho n'o son e e bi, y'e kpechanl'a mobu ju a.¹⁴ Make ni di hun kwerileni ni

1 Ndi Kọrẹnti Isi Nke Ẹsa:15131 Ndi Kọrẹnti Isi Nke Ẹsa:24

Kraịstị a wuṛuṛọlẹ onyẹ wẹ dọn nsọ makẹ ifiri nwunye ẹ hụn kwerini Kraịstị; nwunye hụn kwerilẹni a wuṛuṛuṛọlẹ onyẹ wẹ dọn nsọ makẹ ifiri di ẹ hụn kwerini. Omẹni ẹlẹ ẹrịra, ụmụ ụnụ e ke rị nsọ, kanị wẹ hụ nwan nsọ.

¹⁵ Kanị omẹni hụn kwerilẹni ni Kraịstị a jụ hụn kwerini Kraịstị, ya rị ẹrịra. O rị ẹrịra, o nwọnni iwu gi hụn kwerini, makẹni udọn kẹ Osolobue kpọ ni ẹnyi.

¹⁶ Nwunye, y'a maringhọ kẹ ẹka i kẹ w'a gha zuọpuha di i? Di, y'a maringhọ kẹ ẹka i kẹ w'a gha zuọpuha nwunye i?

Nọdị Ọnọdị I Rị Kẹ Osolobue Kpọ I

¹⁷ K'osilerị, onyẹ-onyẹ ya bime obibi Di-nwọnni-ẹnyi keye ẹ; wẹ nọdị kẹ wẹ nọ oḡen Osolobue gi kpọ wẹ; ebe okuni rị, ọnwan kẹ m'a kuzi ime ụka Kraịstị ile.

¹⁸ Omẹni ihian a kwaguo ugun ni Osolobue d'a kpọbanhan a ime Kraịstị, y'a chọkwọlẹ n'o wepu apa ugun o kwa; omẹni ihian akwanị ugun ni Osolobue d'a kpọbanhan a ime Kraịstị, y'a chọlẹ n'ọ kwa ugun. ¹⁹ Ikwa-ugun enwọnni ihien o wu; akwanị-ugun enwọnni ihien o wu; ihien rị mkpa wu ime ihien Osolobue ku. ²⁰ Onyẹ-onyẹ ya nọdị ọnọdị o rị oḡen Chuku gi kpọbanhan a. ²¹ I wu igbon oḡen o gi kpọbanhan i? Anile ọhun songbu i; kanị omẹni y'a hụn ụzọ y'e gi weri enwen i, ye e weri enwen i. ²² Makẹni, omẹni ihian wu igbon oḡen wẹ gi kpọbanhan a ime Di-nwọnni-ẹnyi, onyẹ weriguu enwen ẹ k'ọ wu ime Di-nwọnni-ẹnyi. Erirazikwo, onyẹ hụn wuleni igbon oḡen wẹ gi kpọbanhan a wu nwan igbon Kraịstị. ²³ Osolobue nọn ụnụ enon; awurulenị igbon ihian.

²⁴ Umune m, nọdị ni nwan ọnọdị ọwule ụnụ rị oḡen Osolobue gi kpọbanhan ụnụ e fe Osolobue.

Ndị Nwọnlẹni Di Mọbu Nwunye

1 Ndi Kọrẹnti Isi Nke Ẹsa:25141 Ndi Kọrẹnti Isi Nke Ẹsa:36

²⁵ Nì ẹnyi ku nwan nke ndi lụlẹni di mọbu nwunye. O nwonni ihien Di-nwonni-ẹnyi si m ku banyeni onwan, kanj m ri e ku uche m, nọke onye furu we gi e don ẹnya ghahani ẹfoma Di-nwonni-ẹnyi. ²⁶ Ke ihien ri ogenni, e rogho m'a n'o furu ni unu nodi ke unu no.

²⁷ Omeni i nwon nwunye, achole n'i ju a mọbu kpechan a; omeni y'e nwonni nwunye, achole n'i luru. ²⁸ Kanj, i luru nwunye, y'e meni njo; okpoho keleni lu di luru di, o meni njo.

Kanj, ndi luni jenkọ d'e nwon nsongbu ime ndunni—nsongbu ahun ke m choko ni m napu unu. ²⁹ Umune m, ihien m gi e e ku wu ni ogen hoduni ehizini; gha kikenni jenne, ndi hun nwonde nwunye we bime nọke si enwon we; ³⁰ ndi ri a kwanni, we bime nọke si a ri we a kwan; ndi ri a ghoghoni we bime nọke si a ri we a ghoghog; ndi hun e nonni, we bime nọke si o nwonni ihien we nwe; ³¹ ndi hun gi ihien uwa e bi, we ewerile e ke si o rika mkpa, w'e gile e don-ẹnya. E bi ni erira makeni uwan ri ogenni ghafeko aghafeko.

³² Achoni m ni unu e rogbu enwen unu. Okenye hun gileni nwunye e ro ihien Di-nwonni-ẹnyi, o ro k'o don me ihien ẹfo gi a suo Di-nwonni-ẹnyi usuo. ³³ Kanj onye hun nwon nwunye e ro ihien uwa, o ro k'o don me ihien ẹfo gi a suo nwunye e usuo— ³⁴ erira ke obi e e kebe. Okpoho mọbu nwa-agboọ hun nwonlẹni di e ro ihien Di-nwonni-ẹnyi, o ro k'o don donmẹchanrin ehụ a le mmon a nso; kanj okpoho hun nwon di e ro ihien uwa, o ro ke o don me ihien ẹfo gi a suo di e usuo. ³⁵ M ri e ku ihienni keni o ri ni unu mma, ele ni m gi e gbondon unu, kanj, keni unu hun uzọ bi k'o furu, buchanrin obi unu che ebe Di-nwonni-ẹnyi ri.

³⁶ Kanj, omeni ihian ri e ro ni o rinj e memẹ onye hun we ẹbuọ kutọ ni we k'a lu ohunma, bu o temeguọ hun okpoho

1 Ndi Kọrẹnti Isi Nke Eṣa:37151 Ndi Kọrẹnti Isi Nke Eṣato:6

mọbụ ni hụn okennyẹ a sakozi ẹka din—o ri hụn okennyẹ ni wẹ luma, ya mẹ ihien hụ o cho, wẹ luma, ẹlẹ njo.

³⁷ Kani onye hụn kwademeguobi obi ẹ n'ọ luko, n'ọ luko okpoho hụ ya le iya kuto, bu ọ rinjị a du a n'ọ luma a—kama, ọ hụ a sa ẹka e kwondon enwen ẹ—onye ahun e meghozikwo ohunma omeni ọ lunjị. ³⁸ Ya wu, onye hụn lunjị mẹ ihien ri ma, kani onye hụn luleni mẹ ihien ka mma.

³⁹ Okpoho nwon di k'a luriri di ẹ, ka si a mẹ ni di ẹ ahun hụ ndun. Kani di ẹ nwunhun, o nwon iken luru onye suo n'a—ka si a mẹ ni onye nke Di-nwonni-enyi k'ọ nurun. ⁴⁰ O mẹ uche m, ọ nodi k'ọ ri, ya ke ọ k'a ka a mma. Onwan wu uche m,—kani e rogho m'a ni mme le enwen m nwonzikwo Mmon Osolobue.

Isi Nke Eṣato

Ihien-oriri Wẹ Gi Rua Mmon

¹ Ni enyi ku nwan nke ihien-oriri wẹ gi rua mmon.

Enyi a maringho ni, “Enyi ile marin ihien” bu imarin-ihien e mẹ ihian a honron mmaka, kani, ihien-osusuo ke wẹ gi e mẹ ihian e sue hun wu usue nke-esi.

² Onye owule ri e ro ni o nwongho ihien ọ marin eke marin ihien o furu n'ọ marin. ³ Kani, onye hun nwe ihien-osusuo jenni Osolobue, ya wu onye Osolobue marin.

⁴ O mẹ nwan nke iri ihien-oriri wẹ gi rua mmon, enyi a maringho ni, ime uwa ile, o nwonni ihien mmon wẹ kpụ akpụ mọbụ hun wẹ koma wu, enyi a maringhozi ni Chuku ohu suo ri—ozo a ri a. ⁵ Ikenkwo o nwongho ihien ndi w'e fe nọke si wẹ wu Chuku bu ẹlẹ wẹ Chuku—ke ndi ri elu-igwee ke ndi ri elu uwa. (Ezioku-ezioku, mmon w'e fe barahi a barahi; ndi w'a kpọ “nna” barahizikwo a barahi.)

⁶ Kani, nke enyi wu ni Chuku ohu suo ri; iya wu Nedi enyi; ihien ile gha ẹka a a-bia; iya ke enyi ri a ri ni ndun. Nna

1 Ndi Kọrẹnti Isi Nke Ẹsato:7161 Ndi Kọrẹnti Isi Nke Itenei:3

ohu rizi, ya wu Jesu Kristi; Osolobue ke ihien ile ghahan'a; enyi ri a ri ghahan'a.

⁷ Kani, ele ihian ile nwe amamihienni. Make ni, o nwegho ndi o me ni irua-mmom a mumariguo, nkesini, we rihu ihien-oriri we gi rua mmom, e weri w'e ke ihien we gi rua mmom, obi we a ru, gbume we mgbu—make ni obi we ezeni. ⁸ Bu ihien-oriri ara me enyi nochime Osolobue: ele enyi ka njo omeni enyi erini, ele enyi ka mma omeni enyi ri.

⁹ Ya wu, kpachanfu ni nwan enya amamgbe unu e memu ni onu e weriguo enwen onu, meghefe e oken, o henrin ihien umune onu zeleni k'a kpoqburu. ¹⁰ Make ni, omeni onye nke Kraistini, hun obi e zeleni, a hun iyu, hun si n'i marin ihien, ebe i ri ulo-mmom e ri ihien-oriri, o kpokinko obi ri ihien-oriri we gi rua mmom? ¹¹ Ya wu, onyeni zeleni, onye itu-Kraisti ibe i, hun Kraisti gi ifiri e nwun, e gi ifiri “amamihien i ni” na iwi. ¹² Unu gha e me umune unu njo enina, a han we e me ihien obi we zeleni gi a rusonme, Kraisti ke unu ri e me njo.

¹³ Ya wu, omeni ihien m'e ri k'e me nwe me danye ime njo, erikozi m anu ahun m'e ri, amamgbe m'e me nwe me dan.

Isi Nke Itenei

Ihien Ru Onye-ozu Pu-ichen

¹ Ele mme nwon enwen m? Ele onye-ozu pu-ichen ke m wu? Ahunni m Jesu wu Nna enyi? Unu ele ihien m runpuha ime orun m ri a runni Di-nwonni-enyi? ² Osuon'a ni ele m onye-ozu pu-ichen enya ndi ozo, m wu onye-ozu pu-ichen ebe unu ri! Ni unu ri ime Onye-nwonni-enyi a ghosiguo ni m wu onye-ozu pu-ichen ime Di-nwonni-enyi.

³ Ihienni ke m ri a za ndi hun ri e kin m ikpe.

⁴ Ғnyi eruni ndi wę k'e yeriri ihien-oriri le ihien-orira?
⁵ Ғnyi enwe ikę iluru onye kwerini kęni ęnyi le iya a wihunme—leke ke ndi-ozu pu-ichęn ndi ozu le umunę Onye-nwonn-ęnyi le Kefasi (wu Pita) don e me? ⁶ Ra we memeni mme le Banabasi suu ya ni ęnyi k'e giriri eka ęnyi nurun ihien ęnyi e gi e bi? ⁷ Elee onye-agma gi ihien e a lu agha? Onye a run ugbo vaini hun ghaleni e ri mkpuru gha ime e puha? Onye e du anu hun ghaleni a ra mirin-eran we gha anu hu wepuha?

⁸ M ride nwan e ku ihieni noku ihian mmaka ra? Ele enina ke Iwu Osolobue ku e? ⁹ Ime Iwu Mozizi, we de si, "Ekenmele okę-efin onu o gha a zopuha mkpuru oka-witi." Efin ke Osolobue ride e ro ra? ¹⁰ Ele ifiri ęnyi k'o gi ku e? Iya-nu, ifiri ęnyi ke we gi de e. Makeni, onye ri a kun oka le onye ri a kukponi furu ni we e me e, e nwon olile-ęnya ni o nwegho hun k'e ru we eka. ¹¹ Omeni ęnyi a kunguo ihien ime-mmou ime igunrun unu, o hie omeni ęnyi a ghonarın unu ihien unani unu nwe? ¹² Omeni unu hu e ye ndi ozu ri a run orun Osolobue ihien ndini runi we, ele ęnyi k'o te furu ni unu ka e ye?

Kani ęnyi a doni unu ihien ndini runi ęnyi, kaka! Hun nke ęnyi e gi me erira, ęnyi no dingbuchanrin ihien owule—hun nke ęnyi e gi bu uke cheni ozioma Kraisti. ¹³ Unu amarın ni ndi hun a run orun ime Ulo-nsu gha Ulo-nsu e nwonhen ihien w'e ri? Unu a marın ni we e keye ndi a run orun ebe w'a no a chu ejan ihien we gi chu ejan? ¹⁴ Eriraziwo, Di-nwonn-ęnyi ti iwu, ni ndi ri e zi ozioma k'a gha ozioma e nwonhen ihien we gi e bi.

¹⁵ Kani, adotuni m kaka akpu ihien ohu ime ihien ndini ile runi m. Arideni m nwan e de ihieni kęni unu meni m we. O kade m mma ni m nwunhun anwunhun kari ni ihian a napu m ihieni m gi a nyan isi.

¹⁶ Kanị, anyankọ m isi nị m rị e zi ozioma, makañi iwu rọ nị m k'e ziriri a. Nsongbu k'a rị nị m omēni ezini m ozioma! ¹⁷ M wefuha obi m ile run ya wu ọrun ozioma, ugwo-ọrun rini m; omēni ewepuhani m obi m ile run a, ọrun wẹ ye m run rọ, m k'a runriri a.

Eka-ọrun Lẹ Ugwo-ọrun

¹⁸ Kị wuzi nwan ugwo-ọrun m? Ugwo-ọrun m wu nị m'e zi ozioma ofe, m'a ra do wẹ ye m ihien runi m noke onye rị e zi ozioma.

¹⁹ Ezie rọ nị mmẹ nwon enwen m; nị ari m okpuru ihian. Kanị, e giguọ m enwen m henrin odibo ihian ile—keni m hun ụzọ wehezini Kraisti ndi bu oda.

²⁰ M ru ebe ndi Ju rị, e bime m ke onye Ju, keni m hun ụzọ wehe ndi Ju d'a marin Kraisti; m ru ebe ndi hun rị okpuru Iwu rị, e henrin m onye rị okpuru Iwu. (Elekwo nị mmẹ lẹ enwen m rị okpuru Iwu.) M'e me e keni m hun ụzọ wehe ndi hun rị okpuru Iwu d'a marin Kraisti. ²¹ M ru ebe ndi rileni okpuru Iwu rị, e bime m rike onye rileni okpuru Iwu, keni m hun ụzọ wehe ndi rileni okpuru Iwu d'a marin Kraisti. (Elekwo ni iwu Osolobue a rị a kị m, kanị m rị okpuru iwu Kraisti.) ²² M ru ebe ndi zeleni rị, e henrin m onye zeleni, keni m hun ụzọ wehe ndi zeleni d'a marin Kraisti.

E henringwo m ihien ile rị ichen-ichen ebe ndi ile rị ichen-ichen rị, keni m gi ụzọ owule rini zuopuha ndi hu ime wẹ.

²³ Ifiri ozioma ke m gi e mesonme ihien ndini ile, keni Osolobue e keye m ngozi rin'a. ²⁴ Unu amarin nị wẹ gha a gba oso wẹ gi a do onu, a zuo ihien ohu, ndi hun a do onu e bu oda, kanị onye ohu suo e nwehen ihien wẹ rị a zuo. Gbakwo nị nwan hun unu e gi nwehen ihien ahun unu rị a chu.

1 Ndi Kọrẹnti Isi Nke Itenei:25191 Ndi Kọrẹnti Isi Nke Iri:7

²⁵ Onyẹ ọwụlẹ hụn a dọ ọnyị ime egumegu, a napụsonmẹ enwẹn ẹ ihien ile ri ichen-ichen. W'e mecharin ihienni ile keni wẹ gi okpu onyẹ-mmeri ahun wẹ ri dọ tu wẹ ugon —okpu mmeri hun e wiwini. Kani, enyi ri e mẹ nke enyi ni enyi hun ụzọ nwonhen hun ghaleni e wiwi. ²⁶ Ya wu, m'a ra gba ọsọ kẹ onyẹ marinleni ihien ọ chuko; m'a ra dụ ikpa kẹ onyẹ ri a dụ ufere. ²⁷ Mba! M'e meshi ehụ m iken, e gi ẹ e henrin igbon m—amangbe m'e zigụ ndi ọzọ ozioma, mmẹ nwen a wuru onyẹ wẹ ju, ni agbani m ohunma.

Isi Nke Iri

Gba Ni Ni Irua-mmọn Oso

¹ Umunem, m cho ni unu marin ihien mē ndi nedi enyi wẹ kani, marin a ohunma-ohunma. Wẹ ile kẹ orukpu hụ du; wẹ ile ghafecharin Ohimin- Ufie hụ; ² wẹ ile henrinsonmē ndi e son ụzọ Mozizi ghahani mirin-Chuku ahun wẹ mē wẹ—orukpu hụ du ni wẹ lẹ Ohimin hụ wẹ ghafe kẹ wẹ gi mē wẹ mirin-Chuku. ³ Wẹ ile ri ihien-oriri ohu ahun hun gha ime-mmọn bja; ⁴ wẹ ile razikwo ihien ohu ahun hun gha ime-mmọn bja—makeni wẹ ra mirin hun gha omuma hụ sonkoni wẹ pucha, hun gha ime-mmọn bja. Omuma hụ wu Kraisti. ⁵ Kẹ ihien ndini ile meni, imerinmē wẹ emeni ihien sọ Osolobue usuo efo, wẹ nọ nwuntosonmē ime atu.

⁶ Ihien ndini wẹ meni nọ wuru ni enyi ihien-nghosi wẹ gi a dọ enyi aka-ntin, amangbe eje-ihien gha a na enyi enya k'o don la wẹ. ⁷ Emekwole ni ndi a ru mmọn kẹ ndi hụ ime wẹ—hun wẹ de ime Ehuhuo-nso, ni
“Ndi hụ nọ nodi ani,
e ri, a ra;
wẹ nọ lihi oto, tenmē egu,
mesonmē ihien wẹ gi a ru mmọn.”

⁸ Ẹnyi agherekoḳwo ni ke ndi hu ime we don me, hun madu nnu-uku eto-kwasi-ogun (madu ogun-iri kwasi nnunai aria nnu-ogun-eto) gi nwunhun akp'ohin ohu; ⁹ Ẹnyi a chokokwo ni ihien ri Di-nwonni-eyi onu ke ndi hu ime we don me, agwo no tagbu we; ¹⁰ edenwinwinwiole ni ke ndi hu ime we don me, mmnon-ozu ahun etikponi no gbupu we.

¹¹ Ihien ndini me ni we wusonme ihien nleri. We detu ihien ndini igi do eyi eka ntin—eyi ndi ri e bi ogen ikpazuunni ihien ile e gi mezuchanrin. ¹² Ya wu, onye hun ri e ro n'o wuzoke, ya kpachanpukwo enya amangbe o dan. ¹³ O nwonni onwunwan biani unu hun ghaleni a biani ihian. Osolobue wu onye we gi e don enya, o niko onwunwan k'a kari unu eka biani unu. Kama, onwunwan bia, o k'a ghosi unu ke unu a don me e, keni unu sa eka meri e.

¹⁴ Ifiri onwan, umune m, gba ni ni irua-mmnon oso!
¹⁵ Ndi nwe uche ke m ri a gwa oku; gi ni eka unu lele ihien m ri e ku. ¹⁶ Mkpu ohu ahun eyi e ye Osolobue ekele, a rarisonme, ele mmeko ke eyi ile le edeke Kraisti ri e meko? Bredi ahun eyi e ye Osolobue ekele, e keru, ele mmeko ke eyi ile le ehun Kraisti ri e meko? ¹⁷ Ebe o me ni bredi ohu suo ro, ya wu ni ehun ohu ke eyi wu, osun'a ni eyi bu oda—makeni eyi ile gba e ri bredi ohu hu. ¹⁸ Ro ni k'o ri ndi ali Izrelu: we ile hun e ri ihien we gi chun ejan e songuoni we me ihien we ri e me ebe ahun we no a chun ejan? ¹⁹ Kini ke m ri nwan e ku? M gi e nwan ri e ku ni ihien-oriri we gi rua mmnon nwon ihien o wu mobu ni mmnon nwon ihien o wu? ²⁰ Mba. Kama, m ri e ku ni eje-mmnon ke ndi a rua mmnon a chuye ni ejan w'a chun, ele Osolobue. Achoni m ni unu le eje-mmnon meko. ²¹ Unu asako eka a rari ihien ri mkpu Di-nwonni-eyi, a rarizikwo ihien ri mkpu eje-mmnon. Unu asako eka e ri

1 Ndị Kọręntị Isi Nke Iri:22 21 1 Ndị Kọręntị Isi Nke Iri:33

ọkwa ihien-oriri Di-nwonnienyi, e rizi ọkwa ihien-oriri eje-mmón. ²² Kini? Enyi ridę nwan a chọ ni enyi me enya fuma Osolobue ufura? Enyi ka a e ze?

Bu Enya Zinme Hun K'e Ye Osolobue Ogho

²³ We si, "Ihien owule ihian cho n'o me ya me e" Kani, ele ihien ile ihian e me e ye aka. We si, "Ihien owule ihian cho n'o me ya me e." Kani, ele ihien ile e me okukwe ihian e sue. ²⁴ Onye owule y'a choma orinimma ndi-ozo, ele nke e.

²⁵ Ri ni ihien owule we re odun anu, ajusonmele ni onu—make obi gha e gbume ihian mgbu; ²⁶ ri ni make ni Ehuho-nso si, "Uwa le ihien ile rin'a wu nke Di-nwonnienyi." ²⁷ Onye wule ni onye itu-Kraisti kpo i oriri, bu y'a chogho n'i jen, i ru e, ri ihien owule we ye i, ajusonmele onu hun obi e gi gbume ihian mgbu. ²⁸ Kani, omeni ihian a si i, "We gi ihien ni ru mmón," erile e nwan—make ufiri onye hu gwa n'i le make obi gha e gbume ihian mgbu, make ni, ["uwa le ihien ile rin'a wu nke Osolobue."] ²⁹ M si, "Make obi gha e gbume ihian mgbu." Obi onye ahun ke m ri e ku, ele nke i.

I k'a si, "Ki we ri e gini obi ri e gbu onye ozo mgbu a gba m nju m gi me ihien m marin ni ele eje-ihien? ³⁰ Omeni e meguo m ekpere, kelegu Osolobue, ni m d'e rime e, ki we ri e gini ihien m ri e kutom, bu e yegugho m Osolobue ekele ni m d'e rime?" ³¹ Ke oriri ke orira ke ihien ozo owule unu e me—e mehanrin ni we ile uzo o k'e gi weheni Osolobue ogho. ³² Ebikwole ni obibi e me okukwe onye owule uke, ke ndi Ju ke ndi ali ndi ozo ke ndi uka-Osolobue. ³³ E bi ni hu ke mme: m'a lili ma uzo ile ni m'e me ihien a suo onye owule. Make ni ele orinimma m ke m ri a cho, kani orinimma ihian ile, keni we hun uzo nwe nzuopuha.

Isi Nke Mmanai

¹ Eson ni nzom'okụ m kẹ m don e son nzom'okụ Kraisti.

Ikpume-isi Ogen Ofufe

² M ri a ja unu mma unu gi a nyanhan m ime ihien ile, e donmechanrin omenali ndi itu-Kraisti ndi hu ke m don gwasonme unu ni 'ya ke we e me e.

³ Kani, m cho ni unu ghotu ni Kraisti wu onye-isi okennyẹ owule, di wu onye-isi nwunye e, Osolobue wu onye-isi Kraisti. ⁴ Okennyẹ owule kpume isi e e me ekpere mọbu e zi ozi Osolobue si we zi ri e budan onye-isi e.

⁵ Kani, okpoho owule bu isi-oghe e me ekpere mọbu e zi ozi Osolobue si we zi ri e budan onye-isi e ebe o no bu isi-oghe, make ni ya le ikpunpu ntutu wu ohu. ⁶ Make ni, omeni okpoho ekpumeko isi e, ya kofu nwan ntutu e. Kani, omeni ihien-ifenren ro ni okpoho ko ntutu e mọbu kpunpu a, ya kpume e.

⁷ Okennyẹ efuruni n'o kpume isi e ebe o me ni o yi Osolobue, o wuzikwo ogho Osolobue; kani okpoho wu ogho okennyẹ. ⁸ Make ni, aghani we okpoho memẹ okennyẹ, kama, we gha okennyẹ memẹ okpoho; ⁹ egin we ifiri okpoho ke okennyẹ, kama we gi ifiri okennyẹ ke okpoho. ¹⁰ Ya hain o gi me ni okpoho k'e nweriri ihien ri a isi o gi a ghasi ni o nwongho onye o ri okpuru e—make ifiri ndi mmon-ozu.

¹¹ Kani, ime Di-nwonna-enyi, okennyẹ ri okpoho mkpa, okpoho ri okennyẹ mkpa. ¹² Make ni, k'o don me ni okennyẹ ke we gha memẹ okpoho, erira k'o don me ni okpoho ke we gha a mufuha okennyẹ. Bu ihien ile gha eka Osolobue bia. ¹³ Gi ni eka unu lele ihien ni: o hughu mma ni okpoho e bu isi-oghe e mejenni Osolobue ekpere? ¹⁴ We k'a gwazi unu a gwa ni ntutu okennyẹ ruke o wuru n'a

ihien-ifenren? ¹⁵ Kani, nke okpoho ru, ogho a ro, makeni we ye e ntutu n'o gi e kpume.

¹⁶ Kani, onye cho n'ọ doma ihienni, enyi enwe uto ozo enyi gi e me e—ke enyi ke ndi uka Osolobue.

Oriri-nsọ

(Mat 26.26-29; Mak 14.22-25; Luk 22.14-20)

¹⁷ Ime ihien ndini m jenkọ d'e ku, a jakọ m onu mma. Makeni, iko unu a ra wehe ihien oma, kama, eje-ihien k'o wehe.

¹⁸ Nke ibuzo, a nugo m ni onu zu ozuzu uka, ni nkebe a risonme ime unu. O nwogho ihien hain m gi gi e don.

¹⁹ W'a ru uka a, ihien ri ichen k'a ri ime unu, hun we e gi marin ndi ri e me ihien ri Osolobue mma. ²⁰ Kani, ihien ahun unu e ri, unu zu, elekwo Oriri-nsọ Di-nwonna-enyi. Kaka! ²¹ Makeni, o ru ogen oriri hu, onye-onye e rime nke e, echeko we ndi ozo, nke wuni onye ohu e buru egun, kani ibe e e gigo manya rajuncharin efo, o hu a tude we! ²² Kini! Unu enwon ulo unu a no ri, ra? Ra unu ri e legberi uka Osolobue, e gbe ifenren e ye ndi nwonleni ihien owule ihun? Kini ke m k'a gwa nwan unu? Ni m gi e jama unu mma? Emeko m'a!

²³ Makeni, ihien m nwonhen aka Di-nwonna-enyi, ya ke m kuzi unu: ni uhinhin hu we re e, ni we d'e we e ye, Di-nwonna-enyi wu Jesu no weri bredi; ²⁴ o yegu Osolobue ekele, o no bebe e; o no si, "Onwan wu ehụ m, hun we gi ifiri unu ye; e me ni onwan e gi e a nyanhan m." ²⁵ Erija k'o mezikwo ogen we gi riguu ihien-oriri enyasi ahun: o weri mkpu manya hu, o no si, "Mkpuni wu nkwerigbama ohun hu we gi edeke m biye aka. E me ni ihienni—ogen owule unu gi a ra a unu gi e a nyanhan m." ²⁶ Ya wu ni, d'e ru mgbe Di-nwonna-enyi bia, ogen owule unu gi e ri bredini, a rari ihien ri mkpuni, unu ri a nyanhan onwun Di-nwonna-enyi.

²⁷ Ya wu nwan ni onye owule ri bredi Di-nwonnienyi mobu rari ihien ri mkpu Di-nwonnienyi uzo furuleni ri e me ehụ le edeke Di-nwonnienyi njo. ²⁸ Ya wu ni onye owule k'e lekpoğuu enwen e, o kebe ri bredi hu mobu rari ihien ri ime mkpu hu. ²⁹ Makeni, onye hun ri bredi hu mobu rari ihien ri ime mkpu hu bu o gbayeni ehụ Nna-enyi, ri e riri ikpe-omuma, a rari ikpe-omuma, e che enwen e isi. ³⁰ Ya hain ndun gileni ri ndi bu oda ime unu, emu hu a ku ndi bu oda, o nwęguode ndi ranhinni, ya wu, ndi nwunhunni. ³¹ Kani, omeni enyi te buzo lekpoğuu enwen enyi, Di-nwonnienyi eke ma enyi ikpe, ye enyi afunfun enina. ³² Kani, Di-nwonnienyi kin enyi ikpe, ye enyi afunfun, o ri e ye enyi afunfun k'e yeni enyi aka, amamgbe enyi e son uwa narin ikpe-omuma.

³³ Umune m, unu zu nwan ni unu ri, e che ni ibe unu. ³⁴ Omeni egun gi ihian, ya riguu ihien-oriri iwe e, amamgbe izu onu gha e buhe ikpe-omuma.

Banyeni ihien ndi hoduni, m bia, a gwa m unu ihien unu jenko d'e me.

Isi Nke Mmębuo

Oyiye Mmon-nso E Yesonme

¹ Umune m, ni m ku nwan nke oyiye Mmon-nso. M cho ni onu ghotu a ohunma. ² Unu a maringho ni ke onu keleni kweri, we dufie unu, teri unu d'e feme mmon ndi rileni ndun ghadeleni e ku oku. ³ Ifiri e, m cho n'o we unu enya ni o nwonna onye gi iken Mmon Osolobue e ku hun k'a si, "Jesu ari mma." O nwonzikwoni onye k'a saeka si, "Jesu wu Di-nwonnienyi" sukpan ni Mmon-nso me e n'o ku erira.

⁴ Oyiye ri udi ichen-ichen, kani Mmon-nso ohu ahun e ye we ile. ⁵ Orun w'a run hun we gi e fe Nna-enyi ri udi ichen-ichen, kani Nna ohu hu ke w'a runni we. ⁶ Ihien we

gi ikēn Osolobue e me ri ichen-ichen, kanị Osolobue ohu ahun suo ri orun ime onye owule, e me we ile.

⁷ Mmon-nsọ e yesonme onye-onye ime enyi oyiye, keni onye hu gi e yeni ndi uka ile eka. ⁸ Osolobue gha eka Mmon-nsọ ye onye ohu oyiye o gi a dun odun, o ghazi eka Mmon-nsọ ohu hu ye onye ozo oyiye o gi ku oku ihian e gi marin ihien o marinleni. ⁹ O ghazi Mmon-nsọ ohu hu ye onye ozo okukwe, ghazi ya wu Mmon-nsọ ye onye ozo oyiye izuo-emu le oria, ¹⁰ yezi onye ozo oyiye irun orun-atumenya, ye onye ozo oyiye izi ozi Osolobue si we zi, ye onye ozo oyiye o gi a marin udi mmon ri orun, yezi onye ozo oyiye isu-asusu ri ichen-ichen, yezi onye ozo oyiye isuhuto ihien onye suni ku. ¹¹ Mmon-nsọ ohu hu, iya nwe e me ihien ndini ile; o keyesonme onye-onye oyiye o cho n'o keye we.

Ehu Ohu, Bu Mkpamkpa Bu Oda

¹² Ehu ohu suo ke ihian nwe, kanị mkpamkpa-ehu bu oda ri ime e. Kanị, ke mkpamkpa ndi hu buhanle oda, ehu ohu suo ke we wu. Erira k'o rizikwo ehu Kraisti. ¹³ Makeni, Mmon-nsọ ohu hu ke we gha gi mirin-Chuku we me enyi bu enyi ile che ime ehu ohu—ke ndi Ju ke ndi ali ndi ozo wuleni ndi Ju; ke ndi wu igbon ke ndi wuleni igbon; we no me enyi ile rarisonme Mmon-nsọ ohu ahun.

¹⁴ Ezie, ehu ele mkpamkpa ohu suo, kanị mkpamkpa bu oda ro. ¹⁵ Uku ihian si, “Makeni ele m eka, ele m nke ehu,” ele ohun k'e me e awuzile mkpamkpa-ehu. ¹⁶ Omeni ntin si, “Makeni ele m enya, ele m nke ehu,” ele ohun k'e me e awuzile mkpamkpa-ehu. ¹⁷ Omeni ehu ile wu enya-enya, k'o k'e gi nu ihien? Omeni ehu ile wu ntin-ntin, k'o k'e gi nu ishin? ¹⁸ Mba, ezioku ri n'a wu ni, Osolobue e gigu eka a donmesonme mkpamkpa owule ri ehu k'o don cho a. ¹⁹ Omeni we ile wu mkpamkpa ohu, elebe nke

ehụ a rị? ²⁰ Kani, k'ọ rị wụ nị mkpamkpa-ehụ bu ọda, kani ehụ ohu sụo rọ. ²¹ Enya e ri-eka sị ẹka, “O nwonni ihien m gi i e me!” Isi e ri-eka sị ụkụ, “O nwonni ihien m gi i e me!” ²² Kama, mkpamkpa-ehụ ndi hụ nọkẹsị wẹ ka anunua rikenmede mkpa nkesini omeni ari w'a, ehụ ezuni oke. ²³ Mkpamkpa-ehụ ndi ahun enyi e weri ni enwon wẹ ogho kẹ enyi e yede ogho pu-ichen; mkpamkpa ndi hun furuleni enya e legha kẹ enyi kade ohunma e donzi, amamgbe wẹ a hun wẹ kẹ wẹ ri.

²⁴ Kani mkpamkpa-ehụ ndi ahun nwe ogho achokani udi ndonzini. Enina kẹ Osolobue donme ehụ—o we ogho kani ye mkpamkpa ndi hụ nọkẹ sị arini wẹ mkpa—²⁵ make nkebe gha a rị ime ehụ, kama, nị mkpamkpa owule hun ụzọ e gi ẹka ohu e lepu ibe wẹ enya. ²⁶ Omeni mkpamkpa ohu nwon nsongbu, wẹ ile e buru nsongbu hụ; ọ bọ mkpamkpa ohu, wẹ ile e sọn ẹ ghoghọ.

²⁷ Unu ile wụ ehụ Kraisti. Onye-onye ime unu wusonme mkpamkpa rin'a.

²⁸ Ime ndi ụka, Osolobue e tumesonmeguo ndi ri ichen-ichen: nke ibuzo wụ ndi-ozu pu-ichen; hun me ẹ ebuo wụ ndi-amuma le ndi e zi ozi Osolobue sị wẹ zi, hun me wẹ eto wụ ndi-nkuzi; ndi ozo wụ ndi a run orun-atumenya, ndi a zuo emu, ndi e yeni ndi ozo ẹka, ndi nwe oyiye iki-okiki le ndi a sụ asusu ri ichen-ichen. ²⁹ Ihian ile wụ ndi-ozu pu-ichen? Ihian ile wụ ndi-amuma le ndi Osolobue e zi ozi? Ihian ile wụ ndi-nkuzi? Ihian ile a run orun-atumenya? ³⁰ Ihian ile nwon oyiye izuo-emu? Ihian ile a sụ asusu ri ichen-ichen? Ihian ile a sūhuto wẹ? ³¹ A nwankenme ni nwan nị unu nwonhen oyiye ndi hụ ka mkpa a rị. Kani, nị m ghosị unu ụzọ ahun kachanrindenị.

Isi Nke Mmēto

Ihien-osusuo

1 Ndi Kọrẹnti Isi Nke Mmẹto:1271 Ndi Kọrẹnti Isi Nke Mmẹto:12

¹ Omẹni m'a sụ asụsụ ile—kẹ nke ihian kẹ nke ndi mmọn-ozị—bụ e nwọn m ihien-ọsụsụ, m wuhụ ẹgogo mọbụ okpokoro-ogbogoro rị a zụn ụzun!

² O mezikwọ ni m nwọn oyiye m gi e bu-amuma, e zini Osolobue ozi, nwezikwọ oyiye m gi a ghotā ihien ile mini lẹ hụn m gi a marinchanrin ihien ile; o mezikwọ ni m nwonchanrin okukwe ile—nweđe hụn m k'e gi saeka bupu ugu onodi a—bụ enwon m ihien-ọsụsụ, o nwonni ihien m wu!

³ Osuon'a ni m wechanrin ihien ile m nwọn ye ndi igbenye, o sọkwon'a ni e kweride m ni wekpọ m okun make okukwe m—ikenkwọ e gi m'e nyan isi—kani, omẹni e nwọn m ihien-ọsụsụ, o banko ni m erere owule!

⁴ Ihien-ọsụsụ nwe ndidi; ihien-ọsụsụ e me efoma; a ra we iwe-anya; a ra nyan isi; a ra pache.

⁵ Ihien-ọsụsụ a gbaye ihian; a ra cho nke e sọ; a ra bukenrin olulu; ihien-ọsụsụ a ra gunto eje-ihien we e me e. ⁶ Eje-ihien a ra sọ ihien-ọsụsụ usuo—ezioku kẹ o ghoghọ ni.

⁷ O nwonni ihien a guu ihien-ọsụsụ ndun, a ra kw-eribehi ni ihien ri mma k'a gha ime ihian puha, a ra nwebehini ihian olile-anya, ndun ndidi ara guu a.

⁸ Ihien-ọsụsụ k'a to jenin ejen. Kani, nke ibu-amuma lẹ izini Osolobue ozi, ogen e k'a ghafe; o me nke asusu ichen-ichen, ogen we k'a ghafe; o me nke amamihien, ogen e k'a ghafe.

⁹ Ogenni, enyi amarinzuni; amuma enyi e bu lẹ ozi enyi e zini Osolobue ezuni. ¹⁰ Kani, ogen hụn zu oke e gi bia, e bu we hụn zulen oke che usuo. ¹¹ Ogen m gi ri nwata, m'e ku kẹ nwata, m'e ro iroro kẹ nwata, m'a tu iroro kẹ nwata. A kaguu m ehụ, m no na obibi nwata to. ¹² Ogenni

1 Ndị Kọręntị Isi Nke Mmęto:13281 Ndị Kọręntị Isi Nke Mmęto:6

ęnyi a hụn bishi-bishi rịkẹ onyẹ rị e lee ughegbe* rịlęni mma. Kani, o ru oge hụ, ęnyi lẹ iya k'a huntari, elee-m, elee-i; kikenni, ęnyi amarinzuni, kani oge hụ, m k'a marinchanrin ihien ile ke Osolobue don marinchanrin m.

¹³ Ihien eto hụn a toni wu: okukwe, olil'ęnya lẹ ihien-osusuo. Kani, hụn kachanrinni wu ihien-osusuo.

Isi Nke Mmęto

Oyiye Asusu Lẹ Igi Oyiye Yeni Ndị-uka Eka

¹ Lilima ni nwan ni unu e nwon ihien-osusuo leni unu a chokenme oyiye Mmon-nso—tumadu igi asusu ihian ri a ghota e zini Osolobue ozi. ² Makeni, onye hun ri a su asusu “ire”, asusu we rileni a ghota, ri a gwa Osolobue oku, ele ihian k'o ri a gwa, makeni, o nwonni onye ri a ghota n'a. O n'e gi iken Mmon-nso e ku ihien-mini. ³ Kani, onye hun gi asusu we ri a ghota e zini Osolobue ozi ri a gwa ihian oku, oku hun k'e me okukwe we sue, gba we ume, kasi we obi. ⁴ Onye hun a su asusu we rileni a ghota ri a gba enwen e ume. Kani, onye hun gi asusu we ri a ghota e zini Osolobue ozi ri a gba ndi uka ume.

⁵ K'o ri m, unu ile a su asusu “ire” ri ichen-ichen. Kani hun m ka a cho wu ni unu e gi asusu we ri a ghota e zini Osolobue ozi. Onye hun gi asusu we ri a ghota e zini Osolobue ozi ka onye hun ri a su asusu “ire” we rileni a ghota—sukpan ni ihian suhuto ihien ahun o ku ye asusu we k'a ghota, keni o gba ndi uka ume.

⁶ Umune m, lee n'e nwan: omeni m bja ebe onu ri, ni a suma m asusu “ire” onu rileni a ghota, nani ke m'e don yeni unu eka, wezuka ni m gi asusu unu k'a ghota gwa unu oku? Ikenkwọ e gi m ya wu asusu unu a ghota gwa

* **Isi Nke Mmęto:12** Igwe we finchanchanrin ohunma ke we gi e henrin ughegbe oge ahun.

ụnụ ihien Osolobue ghosị m, mọbụ a gwa m ụnụ oku ụnụ e gi marin ihien ụnụ marinleni; ikenkwo e zi m ụnụ ozi Osolobue si zi; ikenkwo a kuzi m ụnụ ihien?

⁷ Erira k'o rizide ihien ndi hu rileni ndun we gi a ku egu—noke ekpiri mọbụ ubo: omeni eyeni we olu we enya, nani ke ihian e don ghota ihien onye ri a kponi we ri e ku? ⁸ Opi we gi a kpoqbama ndi jenkwo agha ye olu we ghotaleni, onye k'e konrin agha? ⁹ Erira ke nke unu rizikwo: unu gi asusu ozo hun we rileni a ghoha ku oku, nani ke we e don marin ihien unu ri e ku? Ya wu ni ufere ke unu ri a gwa oku.

¹⁰ W'a ra ru uka a, olu ichen-ichen bu oda ri enu uwa, bu o nwonni hun nwonleni ihien we gi e e ku. ¹¹ O me nwan ni aghotani m olu ahun, m k'a wu otumunye enya onye ri e gi e e ku oku, ya le enwen e a wuru otumunye enya m. ¹² Erira k'o ri ebe unu le enwen unu ri: ebe oyiye Mmonnsori a du unu, liliima ni nwan ni unu e nwekenme we, ni unu e gizikwo we a gba ndi-uka ume, e me uka a gha ihun.

¹³ Ya wu, onye gi asusu we rileni a ghota ku oku, ya me ekpere n'o nwon iken suhuto ihien o ku ye asusu ndi o ri a gwa oku k'a ghota. ¹⁴ Makeni, m gi asusu m marinleni me ekpere, mmon m hu e me ekpere, kani, uche m ari a ghota, o nwonni ihien uche m ri a run. ¹⁵ Ki m'e me nwan? M k'e gi mmon m me ekpere, kani, m k'e mezikwo ekpere m k'a ghota. M k'e gi mmon m bu ebụ, kani m k'a buzikwo ebụ m k'a ghota. ¹⁶ Omeni ele erira, i giguu mmon i ja Osolobue mma, nani ke ogbori a don nwan si "Ise!" gi kweyeni ekele ahun i kele Osolobue, ebe o meni onye hu amarin ihien i ri e ku? ¹⁷ Ikenkwo y'a jagugho Osolobue mma nke-esi, kani o nwonni ke ojija-mma i don yeni okukwe hun-ebọ eka sue.

¹⁸ A kpanmin m Osolobue ni mme ka unu ile asusu "ire" ichen-ichen a su. ¹⁹ Kani, ime ozuzu ndi-uka, o ka m mma

nị m ku mkpuru-oku isen m ghota, hun ndi ozo k'a ghota, o ban ni we erere, kari ni m gi asusu "ire" we ghotaleni ku mkpuru-oku nnu ole-le-ole. ²⁰ Umune m, erole ni iroro ke umueka! Kama, ebe njo ri, a wu ni umueka, kani, o me nke iroro, e ro ni iroro ke ndi ka-ehu. ²¹ Ime Ehuhuo-nso, we de e ni Di-nwonni-enyi si,

"Ndi asusu ozo,

le onu itumunye

ke m k'e gi gwa ndini oku;

kani ele we k'e gonzikwo m tan ntin."

²² Ya wu, ndi kwerileni ke we gi asusu-ire a ghosi aka Osolobue, ele ndi kweriguni; kani, ndi kweriguni ke we gi "Osolobue si" a gwa oku, ele ndi kwerileni.

²³ Ya wu, o me nwan ni ndi uka ile zu, ihian ile a suma asusu ire, ni onye marinleni enya ihien ndini mobu onye kwerileni a banhan, o kuko ni era ri a pu unu? ²⁴ Kani, omeni ihian ile gi asusu w'a ghota e zini Osolobue ozi, onye hun kwerileni mobu onye marinleni enya ihien ndini banhan, ihien ihian ile ri e ku a mama a ikpe, o juma enwen e nju. ²⁵ Ihien ri a obi k'a puha ifon, bu o nweni onye o gwa ihien owule. O k'a kponi Osolobue isi-alj, ye Osolobue ogho, si, "Ezioku-ezioku, Osolobue ri ime igunrun unu!"

Igi Usonron E Me Ihien Ime Uka

²⁶ Kini furu nwan enyi k'e me, umune m? Unu zu, onye-onye nwe ihien o k'a s'eka me; ikenkwo ebu ro; ikenkwo nkuzi ro; ikenkwo ihien Osolobue ghosi ihian k'o cho n'o ku; ikenkwo ozi we jenkwo d'e gi asusu ndi ozo zi ro; ikenkwo we jenkwo d'a suhuto oku ye asusu we k'a ghota. E me ni ihien ile k'o k'a don yeni ndi ile ri uka aka, gba we ume. ²⁷ Omeni ihian k'e gi asusu ndi ozo zi ozi, ya

1 Ndi Kọrẹnti Isi Nke Mmẹnọ:28311 Ndi Kọrẹnti Isi Nke Mmẹnọ:39

wurū madu ẹbuo—o kari-eka, madu ẹto. We ku e onye-ohu onye-ohu. Kani onye siko d'a sūhutoni k'a ririri a. ²⁸ Kani, omeni onye k'a sūhutoni ari a, ndi te k'a suni we gba nkintin ime uka; we gwama enwen we le Osolobue oku ime obi we.

²⁹ Nke ndi hun k'e gi asusu w'a ghota zini Osolobue ozi, madu ẹbuo mobu ẹto we ku—ndi hoduni we gonme ntin, e leban ihien we ri e ku enya.

³⁰ Omeni Osolobue a ghosi onye nodi ali ihien, onye ri e ku oku ya kusi.

³¹ Unu ile k'a sa nwan eka e zi ozi Osolobue si unu zi —onye ohu, onye ohu—keni onye owule munrun ihien, a gba we onye owule ume.

³² Ozozu, mmon onye amuma le onye e zini Osolobue ozi ri okpuru onye ahun—o k'a saeka gba nkintin. ³³ Makeni Osolobue ele Chuku isusu, kani Chuku udon le usonron k'owu.

Rike ke enyi don e me e ime uka ndi-nsọ ile, ³⁴ ikpoho we gba nkintin ime uka ile. Enyi ara ni we ku oku. We we enwen we che okpuru. Iwu e kughosi erira. ³⁵ Omeni we nwon utaa, we ru unọ a ju we di we ya, makeni ihien ifenren k'owu ni okpoho k'e ku oku ime uka.

³⁶ Ra eka unu ke oku Osolobue ghade bidon? Unu sọo k'o ru eka?

³⁷ Onye owule si n'owu onye-amuma le onye e zini Osolobue ozi, n'o ze eze ime mmon, ya ku ezioku ni ihienni m ri e de ni unu wu ihien Onye-nwonni-enyi si we e me. ³⁸ Onye owule si ni ele ezioku, weri n'eni ni 'ya nwen ele ihien ahun o si ni 'ya k'owu.

³⁹ Umune m, igi asusu we k'a ghoha bu amuma le izini Osolobue ozi ya duma unu; k'a sikwole ni w'a sule asusu “ire”.

⁴⁰ Kama, e gi ni usonron e me ihien ile, e me e n'ọ na ęnya.

Isi Nke Mmisęn

Ndị Nwunni Jęko D'a Rizị Ndun

¹ Umunę m, m cho nwan ni m nyanhan ni unu ozioma hun m zi unu, hun unu nabanhan, hun unu turu nwan ime e; ² ozioma ahun Osolobue gi ri a zuopuha unu—omeni unu e kwonkenmegho ozi hu m zi unu—mmani unu kwerihu nke olal'iwı.

³ Makeni, ihienni rikemę mkpa ime ihien ndi ru m eka ri ihien ibuzo m me n'ọ ruzikwo unu eka: ni Kraisti gi ufiri njo ęnyi nwun noke ke Ehuhuo-nsọ don ku e edei; ⁴ ni we li e; ni, nke akp'ohin eto, Osolobue no weli e—noke ke Ehuhuo-nsọ don ku e edei; ⁵ ni Kefasi (wu Pita) hun a; uwe Mmębuo wu ndi-ozı pu-ichen nozi hun a.

⁶ Omęguu, ihien kari madu ogun-isen kwasi nnu ime ndi kwerini nogbamani no hun a. Imerinme we hukwo nwan ndun, kani ndi hu ime we a ranhinguo—ya wu, a nwunhinguo we. ⁷ Omęguzi Jemisi no hun a; omęguzi ndi-ozı pu-ichen ile no hun a. ⁸ Nke ikpazuun ime we ile, mme nwen nozi hun a: mme hun no ke nwa we mu ogen furuleni. ⁹ Ezioku-ezioku, ime ndi ozi pu-ichen ile, onwonni onye m han ke 'ya. Erudeni m onye w'a kpọ onye-ozı pu-ichen, makeni m kpokpo uka Osolobue. ¹⁰ Kani, m wu nwan ihien m wu ghahani efoma Osolobue, bu efoma hu o meni m alani iwi. Kaka! Mmę runkaride onye owule ime we. Kani, ele ni mme run—kama, eka Osolobue hun ri ime ndun m run a. ¹¹ Ya wu, osun'a ni mme zi mobu ni uwe zi, onwan wu ihien ęnyi e zi; onwan wu ihien unu kweri.

Osolobue E Weli Ndị Nwunni Eweli

¹² O mę nwan ni ozi ęnyi wu ni Osolobue gha ọnwun weli Kraisti, kini ke ndi hu ime ọnu ri e kuni ni Osolobue e weliko ndi nwunni? ¹³ Omeni Osolobue ara weli ndi nwunni, ya wu ni o welini Kraisti—ya wu ni Kraisti aghani ọnwun lihi; ¹⁴ omeni Osolobue ewelini Kraisti, ya wu ni ozi ęnyi zi enweni ihien o wu, okukwe ọnu enwonzikwoni ihien o wu. ¹⁵ Ya wuzi ni ęnyi rida nwan e buokin Osolobue ọnu—makeni ęnyi e kuguo ni Osolobue a ghaguo ọnwun weli Kraisti—bu o welin'e, omeni ara weli ndi nwunni. ¹⁶ Omeni Osolobue ara weli ndi nwunni, ya wu ni o welini Kraisti, ¹⁷ omeni Osolobue ewelini Kraisti, ya wu ni okukwe unu wu ihien la iwi, ya wu ni unu rikwo nwan ime njo unu. ¹⁸ Ya wu ni ndi hun ri ime Kraisti ogen we gi nwunhun, ndi ranhinguni, a laguo iwi. ¹⁹ Omeni iri-ndun enu-uwani suo ke ęnyi gi ri e nwon olil'ęnya ime Kraisti, ya wu ni nke ęnyi kacharin njo ime ihian ile ri uwa.

²⁰ Kani, ezioku rin'a wu ni Osolobue a ghaguo ọnwun weli Kraisti, gi e henrin ihien-ugbo ibuzo* o wepuha ni enwen e ime ndi nwunni, gi e ghoji ke ndi hoduni k'e jen.

²¹ Makeni, ebe o mę ni eka onye ohu ke ọnwun ghaha bia, igha ọnwun lihi a ghaguozi kwọ eka onye ohu bia. ²² Makeni, k'o don mę ni ihian ile a nwun ọnwun makeni we le Adam wu ohu, erira k'o donzi mę ni ihian ile k'a gha ọnwun lihi makeni we le Kraisti wu ohu. ²³ Kani, o ru onye o lihi, o ru onye o lihi: Kraisti wu onye ibuzo, mkpuru-ibuzo; o bazi, ndi nke e e lihi. ²⁴ Ohun meguu, njendeme ogen e ru, hun Kraisti jenko d'e gi we Ali-eze che eka Chuku-Nedi—o merichanringuu okiki ile le onye owule ri a kini le onye owule iken owule ri eka a. ²⁵ Makeni,

* Isi Nke Mmisen:20 Ihien-ugbo ibuzo mobu Mkpuru ibuzo wu hun we wepuha ime ihien ugbo, gi ye Osolobue oyiye, we kebe ghorima hun hoduni. O nokin ęnya hun hoduni; k'o ri ke we ri.

Kraistì k'a kiriri d'e ru mgbe o bugu ndi-inenren e ile che okpuru uku a. ²⁶ Enenren ikpazuun o k'e tikpo wu onwun. ²⁷ Makeni, "Osolobue e bugu ihien ile che e okpuru uku." Ya ke Ehuho-nsoku. Kani, omeni Ehuho-nsoku si ni "ihien ile ri okpuru uku a" o wechanrin enya ni Osolobue, hun bu ihien ile che e okpuru uku ari ihien o bu che e okpuru.

²⁸ Osolobue bugu ihien ile che okpuru ya wu Nwa a, ogen hu, Nwa a le enwen e a bia d'a rizikwo okpuru Osolobue hun bu ihien ile che e okpuru—keni Chuku wuru ihien ile enya onye owule, wuru onye ihien ile ri okpuru e.

²⁹ Omeni Osolobue ara weli ndi nwunni, kini ke ndi ahun ri e mefu ni ndi nwunni mirin-Chuku k'e me? Omeni Osolobue ara weli ndi nwunni, ke ihian ri e mepuni ni we mirin-Chuku? ³⁰ Ki enyi ri ni nwan e buni enwen enyi e che ihien onwun gi a kpo enyi ihun ogen ile? ³¹ M'a nwunde uhuhin ile ma! Ezioku rochanrin umune m—k'o don wuru ezioku ni m gi unu a nyan isi make ihien Kraisti wu Jesu Nna enyi me ime ndun unu. ³² Emeni olil'enya ihian-mmaka suo, olil'enya ndunni suo, ke m gi kweri luson eje-anu ndi hu ogun ime ali Efesosì, elee erere k'o banni m?

O me nwan ni Osolobue ara weli ndi nwunni,
"Ni enyi ri nwan;
ni enyi ra—
makeni o ru eki,
enyi a nwunhun!"

³³ Anikwole ni we dufie unu! "Eje-ogbo e wiwi ezi-omume!"

³⁴ Tengin ni nwan nwonrin uche; unu e mebehi njo—ni ndi hu ime unu amarin Osolobue. Kaka! M ri e ku onwan keni ifenren me unu.

Ehu Ndi-nwunni Sikò D'e Gi Lihi

³⁵ Kani, ikenkwo ihian k'a juma ke “Nani ke Osolobue e don weli ndi nwunni? Elee udi ehụ ke we k'e gi bia?”

³⁶ Onye-nzuzu! Ihien i kunye ani ara ri ndun, pu, wezuka n'o nwunhuguu anwunhun. ³⁷ Ozozi, i gha a kun ihien, ele ehụ o jenkọ d'e gi puha ke y'a kunye, mkpuru gba-oto ke y'a kunye: ikenkwo mkpuru oka-witi mobu mkpuru ihien ozo. ³⁸ Kani Osolobue e ye e ehụ hu Osolobue cho; o ye udi mkpuru owule ehụ nke e. ³⁹ Ehụ ihien ile ele udi ohu: nke ihian wu udi ohu; anumanu nwon udi ozo; nnunu nwon udi ozo; azun nwonzikwo udi ozo. Onye le udi a, onye le udi a. ⁴⁰ O nwongho ihien ndi ri elu-igwere, nwezikwo ihien ndi ri elu-uwu; kani ogho ihien ndi ri enu-igwere wu udi ichen, ogho ihien ndi ahun ri elu-uwu wu udi ichen. ⁴¹ Enya-anwun nwon ogho nke e; ifon nwon ogho nke e; kokise nwonzikwo ogho nke e, kokise ichen-ichen nwon ogho ichen-ichen.

⁴² Erira k'o jenkọ d'a ri ogen Osolobue k'e gi weli ndi nwunni: ehụ we li wu hun e rehini, kani hun o k'e weli ara rehi; ⁴³ we li e ebe o nwonleni ogho, kani hun o k'e weli k'e nwe ogho; we li e ebe o kenrenleni, kani hun o k'e weli k'e nwe iken; ⁴⁴ ihien we li wu ehụ ihian-mmaka, kani ehụ ime-mmọn we e legha k'o k'e weli† Omēni ehụ-mmaka ri a ri, ya wu ehụ ime-mmọn rizikwo a ri. ⁴⁵ Erira ke we de e ime Ekukwo-nsọ, si, “Onye ibuzo, hun wu Adam, no henrin ihian ri ndun,” Adam ikpazuun e henrin Mmon hun e ye ndun.

⁴⁶ Kani ele hun ime-mmọn bu uzo bia, kama, hun wu ihian-mmaka bu uzo bia, n'o d'e ru onye ime-mmọn hu. ⁴⁷ Onye ibuzo hu gha uwanị bia, onye we gi ejan memere ro; hun-ebọ gha elu-igwee bia. ⁴⁸ Ke onye hu we gi ejan memere ri, erira ke ndi hun we gi ejan memere ri; ke onye hun

† Isi Nke Mmisẹn:44 ehụ ime-mmọn hun w'e legha enya. Luk 24.33-46; Ndi Filipi 3.21

gha enu-igwee bia ri, erira ke ndi hun wu nke elu-igwee rizikwo. ⁴⁹ Ke enyi don nwon nwan ehụ hun yi onye nke ejan, erira ke enyi k'a donzi nwon ehụ hun yi onye nke elu-igwee.

⁵⁰ Umune m, onwan wu ihien m ri a gwa unu: ehụ-le-edeke asako aka banye Ali-eze Osolobue; ihien a nwunni abanyeko hun ghaleni a nwun.

⁵¹ Gon ni ntin: ni m gwa unu ihien-mini: ele enyi ile k'a nwun (ranhin), kanj, enyi ile jenkọ d'e nwonhuto! ⁵² O k'e me idumuzi: ozigbo-ozigbo, ime ntabe-nya ohu, hun we gihu gbu opi ikpazuun hu! Makeni, ogen opi hu e gi han, ndi nwunni k'e gi ehụ ghaleni a nwun lihi; enyi ndi hun ri ndun e nwonhuto. ⁵³ Makeni, ehụ enyini hun e rehini k'e nwonhutoriri henrin hun ghaleni e rehi; ehụ enyini hun a nwunni k'e nwonhutoriri henrin ehụ hun ghaleni a nwun.

⁵⁴ Ogen ehuni e rehini e gi henringuu ihien ghaleni e rehi, ehuni a nwunni e henringuu hun ghaleni a nwun, o wuru ni ihien ahun we de ime Ehuhuo-nsọ e mezuguo: ni “E meriole we onwan, nke e a guguo!

⁵⁵ Euu onwan!

Elebe ke mmeri i ri nwan?

Euu onwan!

Elebe ke ihien i gi e gbu ri nwan?”

⁵⁶ Ihien onwan gi e gbu wu njo; iken njo wu Iwu.

⁵⁷ Kanj ekele ya rini Osolobue, hun e ye enyi mmeri hu ghahani Nna enyi wu Jesu Kristi! ⁵⁸ Ya wu, ezi umune m, wuzokenme ni nwan; emehunmele ni; a runwaye ni orun Di-nwonni-enyi—ebe o me ni onu a maringho ni orun unu run ime Di-nwonni-enyi alako iwi.

Isi Nke Mmisi

Ihiẹn Wẹ Tụ Nị Ndị Nke Osolobue

¹ Nị ẹnị ku nwan oku ihiẹn wẹ rị a tūnị ndị nke Osolobue rị Jerusalem. Mẹ ni ihienni m gwa ụka ndị rịsonmẹ Galeshĩa me: ² ụhụoḥin ibuzo owule ime izu-uka, onye-onye ime onu y'a gha ihiẹn Osolobue ye e e wepuha, e donme—amamgbe m'a bia unu a tuma ihiẹn. ³ M bia, e we m ehuhuo-ozu ye ndi onu hanpuha, e zi m we bu oyiye unu shi Jerusalem. ⁴ Omeni o huoghọ mma ni mme le enwen m jen, e sonjen we m.

Ihiẹn Pọlu Chọ N'o Mę

⁵ M siko d'a bia d'a hun unu—m ghagbariguu Masedonia —makeni m bu e obi ni m k'a ghaha Masedonia. ⁶ Ikenkwọ e son m unu noye mobu a nodichanrinde m ogen oyi*; keni unu hun uzọ yeni m eka ijẹn m—ebe owule m jenko d'a cho ni m jen. ⁷ Ogenni, achoni m ni m hunhu unu ghafe. Makeni, m cho ni, m bia, a noye m—omeni Dinwonni-enyi a ni m.

⁸ Kanị m k'a nodi ime Efesosi d'e ru ogen Mmemme-Pentikosu, ⁹ ni ezigbo oghere m'e gi runpuha ihiẹn a fuhagunoni m—osun'a ni ndi odakin buzikwo oda.

¹⁰ Omeni Timoti a biaghọ, unu e mekwọ obi ru e ali ime igunrun unu, makeni orun Nna-enyi ohu ahun m rị a run k'ọ rị a run. ¹¹ Ya wu, onye owule y'e legberikwo!a. Hun n'a n'o gi udon la, keni o bia d'e kunrun m—ni m rị a tu enya ya le umunę enyi ndi hu. ¹² Nke nwenę enyi wu Apolosi, a rikemeguọ m'a n'o sonhen umunę enyi ndi ozo hu d'a hun unu, kanị o ke cho n'ọ bia. Kanị, ezigbo oghere puhan'a, o k'a bia.

Oku Ikpazuun

* [Isi Nke Mmisi:6](#) ogen winta

¹³ Dọnrin ni ęnya; turukęnmę ni imę okukwe ụnụ; atụlę ni egun; zekęnmę ni. ¹⁴ Gi ni ihien-ọsụsụọ e mę ihien ile ụnụ e mę.

¹⁵ Umunę, ụnụ a maringụọ ni ikpun-ulo Stęfanasi wụ ndi ibuzọ kwerini Jesu imę Azụn Akaya. Ọzọ wụ n'e buchanringụọ wę enwęn wę che irunni ndi nke Osolobue ọrun. ¹⁶ M ri a si ụnụ hun a ni ụnụ e mę ihien ọwulę ndi nọ ęriira si ụnụ mę hun k'e yeni wę ęka run ọrun hu—kę uwę kę ndi ile e sọn wę a run ọrun hu, a runshi ę ikęn.

¹⁷ Ọbibia Stęfanasi lę Fọtunatosi lę Akayatosi bia hu a sụọ m. A nọkingụọ wę ęnya ụnụ nwęn rileni ebeni. ¹⁸ Wę gba mmon m umę, gbazikwo nke ụnụ. A gbaye ni nwan ndi nọ ęnina.

¹⁹ Uka ndi risonmę Azun Eshia e zi ekele ụnụ. Akwila lę Priska† lę uka hun e zu iwe wę e kele ụnụ ọhunma-ọhunma imę Nna-ęnyi. ²⁰ Umunę ęnyi ile ri ebeni e zi ekele. Dide ni ibe ụnụ odide ri nsọ.

²¹ Mmę wụ Polu gi ęka m de ekeleni. ²² Ibu-onu ya rini onye ọwulę ihien Di-nwonn-ęnyi ghaleni a sụọ!

Di-nwonn-ęnyi, bia!

²³ Efoma Di-nwonn-ęnyi wụ Jizosi ya noyeni ụnụ.

²⁴ M nwę ihien-ọsụsụọ jenni ụnụ ile imę Jesu Kristi.

† Isi Nke Mmisin:19 mọbu: Prisia

Elu Ọhụn: Èkùkwọ-Nsọ (Azụn Ọhụn rịn'a)
Revision of New Testament in Ika

copyright © 2010 Wycliffe

Language: Ika

Translation by: Wycliffe

Ika (ikk) Nigeria

In Nigeria the word Ika is not only the name of the Ika people, but is also used to designate a local government area in the Akwa Ibom State. The Ika people are a sub group of the Igbo people. It is interesting to note that Ika is the name of a town in Croatia is one of the eight Annang local government areas of the local government areas in Akwa Ibom State. An alternative name for the Ika people is Ika-Annang. There appears to be another dialect of Ika that is spoken in Delta State of Nigeria.

Copyright Information

© 2010, Wycliffe. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789037056

Revision

The New Testament

in Ika

© 2010, Wycliffe. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 19 Oct 2021 from source files dated 19 Oct 2021

31b0248e-272a-5dee-8226-bcc00c54d9b1